



UNIVERSITÄTS-
BIBLIOTHEK
PADERBORN

Universitätsbibliothek Paderborn

Opvs De Iudiciis Divinis, Qvae Devs In Hoc Mvndo Exercet

Accessit index concionatorius in omnes totius anni dies Dominicos &
Festos, ab ipso Auctore confectus

Stengel, Georg

Ingolstadii, 1651

6. Bella esse Inferni simulachra.

urn:nbn:de:hbz:466:1-45699

quodlibet membrum communitatis se se debet pro tota communitate exponere. Si secus facit, & propter priuata incommoda, horret damnatque bellum, non est virtutis, sed cuiusdam potius timiditatis, pugnantis cum fortitudine, ad quam spectat, spreto vitæ ac fortunarum periculis, actiones arduas, ob bonum maius excellentiusque non fugere, neque detrectare. *Quid enim, ait S. Augustinus, culpatur in bello? an quia moriuntur quandoque morituri, ut dominantur in pace victuri? Hoc reprehendere timidorum est, non religiosorum.* Quod si ergo, vt febrim discutiamus, non dubitamus brachium nudare, & venam præbere à chirurgo incidendam; neque alia nostra priuata incommoda æstimare debemus, si Reip. ægrotanti est succurrendum. Sed nostra magis sentimus, quàm communia mala? Malus ille est sensus, & qui nos ad grauiora mala trahit. In quæ ne incurramus, hæc ipsa mala nos admonent. Sicut & amor Reipublicæ nos docet, propter amorem Numinis & beatitudinis, (qui est vtiq; pluris faciendus, quàm quæuis Respublica, *quid enim prodest homini, si mundum vniuersum lucretur, anima verò sua detrimentum patiatur? aut quam dabit homo commutationem pro anima sua?*) & bella, & quæuis alia à Deo venientia mala longè libentius promptiusque esse toleranda.

VI.

Tertia caussa est, quam modò attigi, vt per miseras belli discamus horrere miseras æternas Inferorum, quem locum Iob vocat *Terram miseria & tenebrarum, ubi umbra mortis, & nullus ordo, sed sempiternus horror inhabitat.* Nulla igitur belli mala sunt cum Inferorum malis comparanda. Ibi rixæ, ibi verbera, ibi captiuitates, ibi clamores & eiulationes, ibi vincula & catenæ, ibi incendia, & tormenta non bellica, sed Acherontica, ibi compendium omnium malorum. In illa ne cæci ruamus, vtilissimum nobis est, in hac vita experimentum capere aliquod ærumnarum; & prælibare calicem damnandorum, cuius vel minima gutta est, quidquid in hac vita amarum est: quia in altera vita *pluet super peccatores laqueos: ignis, & sulphur, & spiritus procellarum, pars castis eorum.* Cauere docet pœnas, qui periculum facere sinit alterum, num palato illius sapiant. Mortem adhuc nullam viderat Adam, & peccauit: minas mortis audiuit, si positam sibi legem transgrederetur, & transgressus est. *Fortassè non peccasset,*

S. Augustin.
lib. 12. contr.
Faustū, cuius
verba referuntur
etiam à Gratiano
23. q. 1. Can.
Quid culpatur?

Math. 16. 26.

Iob. 10. 22.

Phi. 10. 7.

si vi

vidisset alium ante se morientem. Contempsit itaque, cuius nullum habuit prægustum. Nobis per bellicas ærumnas, per vastationes, per tot cædes Deus Infernum depingit & ante oculos ponit, vt doceat detestari, quod finit experiri. Itaq; paternè nobiscum agit, dum minora ista mala ostendit, vt declinemus a terribilibus malis, illorum comparatione formidata.

Quarta causa est, quia, postquam per unum hominem peccatum in hunc mundum intravit, & per peccatum mors, & ita in omnes homines mors pertransiit, in quo omnes peccauerunt, necesse est, varias dari vias, per quas mors homines abducat, vt mundum vacuet, & locum det successoribus, vt ita tandem impleatur numerus saluandorum. Neque enim sufficit, quosdam hinc decedere, è vita, ob naturalium virium defectum. Cùm enim hæc plerumq; sint ita firmæ, vt multis annis possint durare, augetur in immensum numerum hominum multitudo, nisi extra ordinem aliqui è terra tollerentur. Multi coniuges, singulis annis, tamquam autumnales arbores, fructum ferunt: ac ne deficiat humanum genus, quædam matres pariunt gemellos; & inuenta est nuper in hac vrbe, quæ tergeminos, vna vice, dedit. Iam hi vbi maturefcunt, dant & ipsi censum suum. Sic crescit ab vna stirpe numerus innumerus,

Et nati natorum, & qui nascuntur ab illis.

Vixit Adam centum triginta annis: & genuit ad imaginem & similitudinem suam, vocauitq; nomen eius Seth. Et facti sunt dies Adam, postquam genuit Seth, octingenti anni; genuitq; filios & filias. Et factum est omne tempus, quod vixit Adam, anni nongenti triginta, & mortuus est. Si ergo singulis annis singulos liberos, vel certè liberos liberorum suscepit, quot necesse est, eum nepotes vidisse? Idem cogitari potest de Seth, cuius facti sunt omnes dies nongentorum duodecim annorum: idem de Enos, cuius facti sunt omnes dies nongenti quinque anni: idem de Cainan, cuius facti sunt omnes dies nongenti decem anni: idem de Jared, cuius facti sunt omnes dies nongenti duo anni: idem de Mathusala, cuius facti sunt omnes dies nongenti sexaginta nouem anni; idem de Noë, cuius impleti sunt omnes dies nongentorum quinquaginta annorum. Quantam ab his necesse est prolis multitudinem descendisse? Neque refert, vitam homi-

VII.
Rom. 5. 12.

Virgil. lib. 3.
Æneid.
Gen. 5. 3.

Gen. 5. 8.
Ibid. v. 11.
Ibid. v. 14.
Ibid. v. 20.
Ibid. v. 27.
Gen. 9. 29.